

浙江文叢

黃宗羲全集

〔第十冊〕

浙江出版聯合集團
浙江古籍出版社

浙江文叢

黃宗羲全集

〔第十冊〕
宋元學案八

浙江出版聯合集團
浙江古籍出版社

宋元學案卷七十

黃宗義原本 黃百家纂輯 全祖望補定

滄洲諸儒學案下

【宏齋門人】劉李三傳。

文元饒雙峰先生魯別爲雙峰學案。

忠敏趙先生范

趙范，字武仲，衡山人。忠肅公方子，與弟忠靖葵，俱有大志。少從鄭清之、牟子才學。從父軍中。嘉定間，嘗與忠靖殲金人於高頭。累官知揚州、淮安撫副使，屢立戰功。進工部尚書，沿江制置副使。後爲京湖安撫制置使兼知襄陽。卒，謚忠敏。參姓譜。

忠靖趙庸齋先生葵

趙葵，字南仲，忠敏弟也。以功累官知滁州，度李全必叛，乃聚兵爲戰守計。及全寇揚州，先生率衆與戰，出奇破之，斬全以歸。淳祐中，進端明殿學士、知潭州。後拜右丞相兼樞密使，

封魯國公。先生有英武之才，累立大勳，朝廷倚之爲重者二十年。卒，贈太傅，謚忠靖。子潛同上。

梓材謹案：宋史先生本傳：「與兄范俱有志事功，父方器之，聘鄭清之、牟子才爲之師，又遣從南康李燾爲有用之學。」是先生固李敬子弟子也。

方連雲先生暹別見勉齋學案。

布衣宋先生斌見上晦翁門人。

進士許先生應庚別見雙峰學案。

【槎溪門人】

提刑鄒先生應博

鄒應博，泰寧人。受學於廖槎溪。開禧初，登第。寶慶中，監行在都進院。奏對，謂：「書目：『人心惟危，道心惟微。惟精惟一，允執厥中。』朱熹謂人不能無人心，亦未嘗無道心。人心者，如飲食男女好樂忿懣之類是也。若無此，則何以爲人乎？惟其縱而不知檢，則逐物而遷，故曰『人心惟危』也。道心者，良能良知也。而此心必甚微而難見，聖人充吾良能良知之心，使天理流行而昭著，則人心自入於檢防之中也。」嘗知婺州、蘇州，提點江南西路刑獄，爲真西山所薦云。

推官陳貫齋先生沂別見北溪學案。

【果齋門人】

清忠牟存齋先生子才別見鶴山學案。

縣令葉先生采

葉采，建安人。安仁令子是之仲子也。鄉貢進士。壻於李公晦，從公晦問學，得其指歸。

參真文忠集。

梓材謹案：學案原底於葉平巖傳云：「初事節齋，後事淳。」方子即公晦。蓋宋有兩葉采，事節齋者

平巖，事公晦者先生，因同名而誤及之耳。又案：先生嘗爲昌化宰，見胡石塘所作陳孝子傳。

推官陳貫齋先生沂別見北溪學案。

【毅齋門人】

祕書王唐卿先生世傑

王世傑，字唐卿，義烏人。官祕書丞。初，徐文清公倡道丹溪上，及門者或仕或不仕，皆時

聞人。文清之學，蓋親得於考亭，而先生則有得於文清者也。參黃文獻集。

左司朱勵志先生元龍

朱元龍，字景雲，義烏人。嘉定十六年進士。歷除宗正丞兼權左司郎官。宦官陳恂益求建節，事下都司議，先生擬曰：「優異內官，寵賚節鉞，雖出於特恩，主張國是，愛惜名器，必由於公論。不可。」宰臣傳旨，令改擬，對曰：「吾職可罷，筆不可改也。」有宗室與民論圩田，衆莫敢決，先生曰：「於法品官不許佃民田，奈何天子屬籍之親，乃爭田訟邪？」毅然決之。時議括兩淮浮鹽，先生謂：「朝廷而行商賈之事，廟堂而踵諸閭之規，使史氏書曰：『括浮鹽，自今日始。』不可。」又兩上封事，自宮禁朝廷以及百官萬民，皆痛切言之。先是史嵩之在督府，先生劾其殺富民王倫爲非，已而嵩之入相，遂斥去，予祠。參王華川集。

雲濠謹案：王忠文嘗離先生左司集云：「始公受學鄉先生毅齋徐公，又從四明繫齋袁公遊。公之學，蓋會朱、陸之異以爲同。其予祠也，家居十年以卒。」又稱先生爲厲志先生，「厲志」一作「勵志」。

葉通齋先生由庚

葉由庚，字成甫，義烏人。生而口吃，嗜讀書，試有司不中，遂絕意進取。時徐文清倡明朱子之學，先生執經從之，文清授以「中、誠、仁、命、性、心」六字之說。與金華何北山、王魯齋辯析理學，不立異，不苟同，虛己精索，必求真是之歸。其誨學者曰：「古之人知行並進，若纏蔽

於文字間，待其知至而後行，是終無可行之日也。」人以爲名言。學者稱通齋先生。

鄉貢朱先生中

朱中，義烏人。徐文清弟子。著太極演說、經世補遺。補。

雲濠謹案：先生宋鄉貢進士，爲文清高第弟子，見宋潛溪所銘先生孫裕軒墓碣。

【雲莊家學】

知州劉靜齋先生屋

劉屋，字伯醇，建陽人。雲莊之子。自號靜齋。補承務郎、知江寧縣，辟制置司幕官。以

收李全功，轉朝請大夫、知常州、衡州。移南劍州，以疾不赴，與學徒熊竹谷輩講道終其身。參

姓譜。

【雲莊門人】

推官陳貫齋先生沂別見北溪學案。

【允夫門人】

縣尉董槃澗先生銖見上晦庵門人。

【元善門人】

文忠真西山先生德秀別見西山真氏學案。

【蒙谷門人】

文忠江古心先生萬里父煜，附門人陳偉器。

江萬里，字子遠，都昌人。自其父煜始業儒。先生少神雋，有鋒穎，連舉於鄉。入太學，有聲。理宗在潛邸，嘗書其姓名几硯間。以舍選出身，歷知吉州，創白鷺洲書院。權知隆興府，創宗濂書院。遷考功郎官，命旋寢。久之，以駕部郎官召，遷尚右兼侍講。史嵩之罷相，拜監察御史，仍兼侍講。未幾，遷右正言，殿中侍御史，又遷侍御史，未及拜。先生器望清峻，論議風采，傾動一時，帝眷注尤厚。既而坐騰謗閑廢者十有二年。後陸德輿嘗辨其非辜於帝前。

賈似道宣撫兩浙，辟參謀官。歷遷刑部侍郎兼國子祭酒、侍讀。入對，遷權吏部尚書，又拜端明殿學士、同簽書樞密院事兼太子賓客。隨以言者去官。後以原職知建寧府，知福州兼福建安撫使。度宗即位，召同知樞密院事，又兼權參知政事。先生始雖俯仰容默，然性峭直，臨事不能無言。似道常惡其輕發，故每人不能久在位。似道以去要君，帝初即位，呼爲師相，至涕泣拜留之。先生以身掖帝云：「自古無此君臣禮，陛下不可拜，似道不可復言去。」似道不知所爲，下殿舉笏謝曰：「微公，似道幾爲千古罪人。」然以此言忌之。帝在講筵，每問經史疑

義，及古人姓名，似道不能對，先生常從旁代對。時王夫人頗知書，帝語夫人以爲笑。似道聞之，積慙怒，謀逐之。先生四丐祠，不候報出關。加資政殿大學士、知慶元府兼沿海制置使，不拜，予祠。後二年，知太平州兼提領江淮茶鹽兼江東轉運使，召拜參知政事，進對南康郡公。既至，拜左丞相兼樞密使。丐祠，加觀文殿大學士、知福州，辭，依舊職，提舉洞霄宮，又授知潭州、湖南安撫大使，加特進，尋予祠。時咸淳九年，先生年七十有六矣。

明年，元兵渡江，先生隱草野間，爲遊騎所執，大詬，欲自戕，既而脫歸。始先生聞襄樊失守，鑿池芝山後圃，扁其亭曰「止水」，人莫諭其意。及聞警，執門人陳偉器手，曰：「大勢不可支，余雖不在位，當與國爲存亡！」及饒州城破，軍士執其弟萬頃，索金銀不得，支解之。先生竟赴止水死。事聞，贈太傅、益國公，後加贈太師，謚文忠。參史傳。

梓材謹案：儒林宗派以先生爲林子武門人。

【古心學侶】

縣令劉月澗先生南甫附從子由聖。

劉南甫，字山立，號月澗，吉水人。年十七，以治尚書擢嘉熙二年進士第。爲縣安遠，能去淫祠，人稱神明。警敏絕倫，最爲江丞相萬里所重。歐陽巽齋雖與爲輩行，然師事之。其學傳於從子□□，字由聖，號方壺先生。參解春雨集。

梓材謹案：吉水縣志載先生嘗講學白鷺書院，書院爲江丞相所創，則先生本古心學侶也。

【竹隱家學】

知州傅先生壅

傅壅，字仲珍。忠簡之子。慶元中登第。知崇安縣，創均惠倉，增學田，立義冢，邑人爲立祠。用課最，歷大理寺丞，審冤獄得實，卿以下患之，臺諫劾罷。旋以獄直，知南劍州，改漳州。先是忠簡兄弟相繼守漳，先生治如其父，邦人安之。徙撫州，以都官郎召，未至，卒。

徽猷傅先生康

傅康，字仲良，忠簡之子。以父任知古田縣，猾胥匿簿書，賦入日少，先生籍其家，出所匿，復得實，邑計以饒。爲司農寺丞，知汀州。時兄仲珍守漳，其父往來就養，鄉人榮之。徙南劍，發奸摘伏，吏不敢欺。累進司農少卿兼左司諫，練熟典章，上甚材之。晚知袁州，直徽猷閣致仕。

【性善門人】

文安趙星渚先生景緯

趙景緯，字德父，於潛人。少勤學，弱冠得周、程諸書讀之，恨不及登朱子之門。朱子門人葉味道謂之曰：「度正吾黨中第一人。」遂往見，首誨以求放心爲本。由是往來葉、度之間，研索益精。入太學，登淳祐進士第。授江陰軍教授，諸生守其矩度。丁母憂，以祿不逮養，服闋不調。作讀易庵懸雷山。每進華秩，必固辭。歷知台州，兩辭，不許，趣命益嚴。至郡，以化民成俗爲先務，取陳述古諭俗文書示諸邑，且自爲之說，使其民更相告諭，諷誦服行，期無失墜。約束官吏擾民五事。取孝經庶人章爲四言，詠贊其義，使朝夕歌之，至有爲之感涕者。舉遺逸車若水、林正心於朝。旌孝行，作訓孝文以勵其俗。平重刑，懲譴訐。治豪橫，建黃巖縣社倉六十有六。其善政不可殫載。

進考功郎，四辭新命；且乞於赤城、桐柏之間采藥著書，庶幾有補後學，使病廢之身，不爲無用於聖世，不許。御批兼崇政殿說書，三辭，不許。乃造朝，侍緝熙殿，以易進講，論：「聖人體元之妙在惟幾，人君得此，則天下有治而無亂，人事有吉而無凶矣。」又曰：「惕厲祇懼，乃天心之所存。聖人先處於憂，故能無憂。先處以危，故能無危；若乃先自處於安樂，則憂危乘之矣。」又論監司守令舉刺不當，不足以服天下之心。彗出於柳，先生應詔上封事。拜太府少卿，以直敷文閣知嘉興府，辭，乞奉祠，不許。拜宗正少卿兼侍講，乞祠還家。御筆趣行，除兼權工部侍郎，時又命兼權中書舍人，三辭，不許。以禮記進講，開陳敬恕之義。封還濫恩詞頭，帝從之。進權禮部侍郎兼修玉牒，再辭，不許。進聖學四箴：一曰惜日力以致其勤，二曰精體認以

充其知，三曰屏嗜好以專其業，四曰謹行事以驗其用。授集英殿修撰、知建寧府。召爲中書舍人，進顯文閣待制，乞祠，遂差提舉玉隆萬壽宮。未幾，疾作，謝醫却藥，曰：「使我清心以順天命，毋重惱我懷。」拱手三揖而卒。詔特贈四官至中奉大夫，謚文安。參史傳。

梓材謹案：先生號星渚，見車玉峰所作台州新闢五邑坊場河渡錢記。

【北山家學】

忠肅陳先生韓別見水心學案。

【復齋門人】

山長黃德遠先生績別見下瓜山門人。

【蒙齋門人】

州判董介軒先生夢程別爲介軒學案。

【槃澗家學】

州判董介軒先生夢程別爲介軒學案。

【槃澗門人】

董復齋先生琮

程古山先生正則並見介軒學案。

【蓮塘門人】

進士陽字溪先生枋

陽枋，號字溪，稱大陽先生。有易說。

梓材謹案：先生銅梁人，淳祐中進士，見四川總志。又案：大陽五世孫有撰玉井易說者，佚其名。

陽存齋先生岳

陽岳，號存齋，稱小陽先生。有易說。

梓材謹案：大、小陽先生，及韓禮部傳，原與靜清同卷，爲四明朱門學案之一，謝山改定爲靜清學案，靜清以上，併入是卷。

【遠庵家學】

方先生丕父別見勉齋學案。

【二寶門人】

衛先生炳

衛炳，字晦仲，句容人也。從二寶兄弟遊，不爲今學，而爲古學，落落不苟。二寶嘗介之以見漫塘，稱其氣肅而言質，空谷足音。顧早卒，君子惜之。補。

【靜一門人】

衛先生翼

衛翼，字翼之，句容人。從湯靜一游，即晦仲從兄弟也。漫塘稱真有遠韻。補。

【玉峰門人】

知軍江先生塤，別見西山真氏學案。

【瓜山門人】

山長黃德遠先生績

黃績，字德遠，莆田人。初游淮、浙，遍參諸老。已而從陳師復、潘謙之二子遊。及二子卒，同門友築東湖書堂，而請田於官以祀之，讀約聚講如二子規約，由是學者皆就正於先生。郡守推入尊德堂，以繼劉彌邵，又辟充涵江書院山長。先生以「獨不懼」名齋。所著有四書遺說、近思錄義類。

蘇先生國台

蘇國台，仙遊人。辰州守權子。從潘柄講學。補。

【溪齋門人】

趙省之先生雷

趙雷，字省之，縉雲人。滕溪齋弟子。參儒林宗派。

【德章家學】

縣令滕萬菊先生鉛

滕鉛，字和叔，婺源人。合肥令德章之子。爲安仁令。所得所授，學有源委。注尚書行於世。參姓譜。

【洞源門人】

黃先生輔別見勉齋學案。

臨稅李先生仁屋

李仁屋，字載叔，德興人也。直煥章閣駿之子。官鎮江都稅院監。從胡伯量學。二十八歲而卒。漫塘劉文清公志其墓曰：「載叔來金壇，伯量與偕。載叔出語稍易，舉事稍偏，伯量必正色折之，載叔斂衽謝惟謹。平生所見後生敬事師友，未有如載叔者。伯量去，人謂載叔稍自適矣，載叔對曰：『方胡先生在，吾飲酒過三酌輒醉，醉而安寢，恃以無失。及先生去，吾飲不醉，然其寐也，憂其不能無失。吾敢以離群索居爲樂也哉！』其初至金壇，得一室蕭寺中，僅容兩几，廩無繼粟，庖無繼肉，人謂當重不堪，而載叔不之戚也。比憲檄下，令人幕，載叔反以侵官出位爲戒，遲回久之，求益於其友。則載叔之死，豈徒李氏失一佳子弟哉！」補。

【歐陽家學】

著作歐陽巽齋先生守道別爲巽齋學案。

【淡軒門人】

運判孟先生渙別見槐堂諸儒學案。

【信齋門人】

提舉李先生鑑別見勉齋學案。

【堯卿門人】

鄉舉陳先生思謙

陳思謙，字退之，龍溪人。學問該博，教授後學，嘗魁鄉薦。著春秋三傳會同及列國類編，朱文公喜之，因語其門人李唐咨以女妻焉。

【至之門人】

推官陳貫齋先生沂別見北溪學案。

【搗堂門人】

王立齋先生侃

運使王敬巖先生泌並見北山四先生學案。

【吉甫家學】

侍郎孫先生願質附子璿。

孫願質，鄆縣人。吉甫次子。紹定五年進士第，後中教官科，終工部侍郎。子璿，字壽朋，知臨海縣，奉母在官，元兵至，母子俱蹈難死。丞相葉夢鼎、尚書王應麟嘗以文章薦之。參至正四明志。

【履之家學】

劉先生子玠別見勉齋學案。